

62 عور-سار-اسوسغ

- 1 ربي واحدوت اد-دار-سيگيلغ اسونفو،
دارس ا-غ-طافغ لامان.
- 2 ربي واحدوت ا-يگان اجاريف-ينو
ايگ لبرج ايگ انتال-ينو،
عور-سار-موسغ.
- 3 ار ماناگو ا-را-تيريم ا-تاکلم ف-بنادم،
تيريم ا-بي-تسّصرم زوند اغراب ايکنان،
زوند تابيا عيهرمن؟
- 4 ار-کن-يتعجاب ا-تادرم تیکرکاس،
تسکرم ف-ا-بي-دي-تکرم زغ-تاريگت-ينو.
دا-تاگام تاميمت س-يلس
ايمّا عول عيعمّر س-واسموم.
- 5 ربي واحدوت اد-دار-سيگيلغ اسونفو،
د-نتان ا-غ-ن-کيغ رجا.
- 6 ربي واحدوت ا-يگان اجاريف-ينو
ايگ لبرج ايگ انتال-ينو،
عور-سار-اسوسغ.
- 7 ربي واحدوت ا-را-بي-يسيدّ غ-لامان،
د-نتان ا-را-يساتوي عيسم-ينو،
ايگ اجاريف ايزگان ايگ ازواک-ينو.
- 8 واي-ايتما تيقات غ-ربي کرايگاتّ تاساعت،
تينيم-اس ف-کولو ما-يسغوفون عول-نون،
نتان ا-غ-ا-نترزاواک.
- 9 هاتي امثلوض زوند تونفوست ا-يزراي،
ايمّا بو-وايدا تاوارگيت کا-يگا.
نتني س-سين هاتين فسوسن ف-يات-تونفوست،
ار-سرسن-ياقلاي لميزان.
- 10 اور-تبّوم س-ما-دي-تکيسم س-يفادّ،
عولا-دا-تاويم رجا س-ما-دي-توکرم.
ايغ-د-يوشکا لخير ايجوتن ا-ور-فلاس-تسکرم.
- 11 هاتي يات-توال ايساول سيدي ربي،
تيس سنات-توال سفلدغ-اس اينا،
نتان ا-بدا-يحکامن غ-کولو ما-يلان.
- 12 د-نتان اد-اغ-يران س-لحانت-نس ايزگان،
د-نتان ا-يتخلاصن اي-کرايگاتّ يان ف-ما-يسکر.